

春秋左傳類解

春秋左傳類解杞卷之五

蘆泉劉績編註

杞

今河南開封府杞縣

姒姓公爵夏禹之後

禹都山西夏縣故謂夏

成湯放桀其後稍

絕武王克商求夏禹苗裔得東樓公封杞以奉禹祀

其地開封府雍立縣是也東樓公生西樓公西樓公

生題公題公生謀娶公謀娶公生武公二十九年入

春秋後嘗遷都緣陵維州營立是也又遷淳于因淳

于公亡國始并之淳于即古之州國密州高密有故

淳于城至閔公維之六年獲麟閔公在位十六年爲

弟哀公弑。哀公立十年卒。濬公子出公。款立。

一作立

十二年卒。子簡公。春立。一年楚惠王滅之。

武公

謀娶公子二十九年入春秋桓八年卒在位四十七年。蓋法刑民克服曰武。

壬戌四年春王二月。莒人伐杞。取牟婁。

杞邑也。城陽諸縣東北有。

卿婁

○穀梁曰。傳曰。言伐言取。所惡也。諸侯相伐取地。

於是始故謹而志之也。

註稱傳者谷梁子不親交於師而聞之於傳者既伐

其國又取其土。明伐不以罪而貪其利。兩書取伐以彰其惡。

辛未桓二年

○秋七月。杞侯來朝。

公較作杞侯

○九月入杞。

秋七月。杞侯來朝。不敬。杞侯歸。乃謀伐之。○九月

入祀討不敬也。

壬申桓三年

○六月公會祀侯于成祀公作紀

公會祀侯于郕祀求成也

靖公

武公子桓九年即位莊十三年卒在位二十三年卒謚法柔德安衆曰靖

辛巳桓十二年

○夏六月壬寅公會祀侯于盟于曲池祀公

殺作紀曲池公作歐就

十二年夏盟于曲池

魯國汶陽縣北有曲水亭

平祀晉也

隱四年晉

祀伐

共公

靖公子莊十四年即位二十一年卒在位八年謚法敬事供上曰共

惠公

史記作德公共公莊二十二年即位僖五年卒在位十八年謚法愛民好與曰惠

壬子莊二
十五年
○伯姬歸于杞伯姬莊公女為惠公夫人

之道微無
足道焉爾

甲寅
二十有七年春公會杞伯姬于洮洮魯地婦人無期會之禮

公以受女故非事往會伯姬不顧禮從命來會皆非也
○冬杞伯姬來○杞伯

來朝高氏曰致伯姬也杞伯不能制其內縱其數出又來朝而致之其卑弱可知矣杜云杞稱伯者

蓋為時
王所黜

二十七年春公會杞伯姬于洮非事也天子非展

義不巡守杜云巡行以宣布德義今按展省視諸也展義謂朝會齊度量一權衡等事

侯非民事不舉卿非君命不越竟○冬杞伯姬來

歸寧也凡諸侯之女歸寧曰來出曰來歸夫人歸

寧白如某出曰歸于某

禮父母在歲一歸寧春既會而又來非禮也

丙寅僖五年

○杞伯姬來朝其子

伯姬私愛幼子欲行朝禮相之同來

○穀梁白婦人既嫁不踰境踰境非正也

此言伯姬來朝

禮為非

諸侯相見曰朝伯姬為志乎朝其子也伯姬

為志乎朝其子則是杞伯失夫之道矣

此言伯姬

欲行諸侯禮杞伯不能禁是失為夫之道而非禮矣

諸侯相見曰朝以待人

父之道待人之子非正也

此言公受其非禮

故曰杞伯

姬來朝其子參譏也

譏伯姬也

成公

惠公二十三年卒在位十八年謚法安民立政曰成

甲戌僖十三年

○公會齊侯

桓

宋公

襄陳侯

穆

衛侯

文鄭伯

文許男曹伯

共

于鹹

衛地東郡濮陽東南有鹹城

夏會于鹹淮夷病杞故且謀王室也

特王子帶奔齊周有戎難

乙亥

十有四年春諸侯城緣陵

緣陵杞邑

十四年春諸侯城緣陵而遷杞焉不書其人有闕

也

有闕不終事也

○穀梁曰其曰諸侯散辭也

註直曰諸侯無大小之序是猶自欲賊無

摠一之者非伯者所制故曰散辭

聚而曰散何也諸侯城有散辭

也桓德衰矣

註言諸侯城則非伯者之爲可知矣齊桓德衰所以散也

○公羊曰孰城之城杞也曷爲城杞滅也孰滅之

蓋徐晉魯之曷爲不言徐晉魯之爲桓公諱也曷

爲爲桓公諱上無天子下無方伯天下諸侯有相
滅亡者桓公不能救則桓公耻之也然則孰城之
桓公城之曷爲不言桓公城之不與諸侯專封也
曷爲不與實與而文不與文曷爲不與諸侯之義
不得專封也諸侯之義不得專封則其曰實與之
何上無天子下無方伯天下諸侯有相滅亡者力
能救之則救之可也

甲申僖二
十三年

○冬十有一月杞子卒

程子曰杞三王後
而伯爵疑前世黜

之也中問從夷故
子之後復稱伯

十一月杞成公卒書曰子杞夷也

成公始行夷禮
以終身故於卒

賤之祀實稱伯故仲尼以文貶稱子

不書名未同盟也凡諸侯同盟

死則赴以名禮也赴以名則亦書之不然則否辟不敏也

桓公

名姑容惠公子成公弟僖二十四年即位襄六年卒在位七十年謚法克敬勤民曰

桓史記無成公作德公弟

僖子

二十有七年春祀子來朝○乙巳公子遂帥師

入祀

杜云八月無乙巳乙巳在九月六日弗地曰入

二十七年春祀桓公來朝用夷禮故曰子公卑祀

祀不共也

共同恭也

○秋入祀責無禮也

已丑僖二

○秋祀伯姬來

伯姬乃莊公女母成風猶在歸寧曰來祀桓公乃伯

姬次子即位來朝為魯車又使卿
帥師入其國故伯姬來謝過求平

壬辰僖三

○冬杞伯姬來求婦

婦者嫁姑辭求僖公女叔姬為桓公夫人

王后詔命不施於天下夫人教命不施於境中婚姻
大事夫人主之書以為亂政之戒谷梁所謂來求婦
非正是也

○公羊曰其言來求婦何兄弟辭也其稱婦何有
姑之辭也

丙午文
十二年

○杞伯來朝二月庚子叔姬卒

書子以別非先君之女也

杞桓公來朝始朝公也且請絕叔姬而無絕昏

已詳嫁杞伯來朝請絕叔姬復求其故曰無絕婚

公許之二月叔姬卒

不言杞絕也書叔姬言非女也

○公羊曰此未適人何以卒許嫁矣婦人許嫁字而笄之死則以成人之喪治之其稱子何貴也其

貴柰何毋弟也註不稱毋妹而繁先君言子者遠別也

庚午宣
十八年
○公伐杞祀自文十二年來朝不復至故伐之

甲戌成
四年
○杞伯來朝

杞伯來朝歸叔姬故也將出叔姬先脩朝禮言其故

乙亥
五年春王正月杞叔姬來歸叔姬始嫁不見於經婚姻得禮常事

書不

○穀梁曰婦人之義嫁曰歸反曰來歸被出而歸也

戊寅成
八年
○冬十月癸卯杞叔姬卒

冬杞叔姬卒來歸自杞故書叔姬已絕於杞不書杞則疑魯未嫁女故

繫祀兄既嫁被出也

己卯成九年春王正月杞伯來逆叔姬之喪以歸謂叔

姬本不應出故魯人得以義責之使復歸葬

九年春杞桓公來逆叔姬之喪請之也叔姬已絕於杞魯後

強請杞使逆葬杞叔姬卒為杞故也杞婦故卒書杞逆叔姬為我

也既奔而復逆喪明重魯請故

戊子成十八年○秋杞伯來朝

秋杞桓公來朝勞公且問晉故時魯朝晉悼公公以晉君

語之杞伯於是驟朝于晉而請為昏為平公不徹樂張本

甲午 六年春王三月壬午杞伯姑容卒。○秋葬杞桓公。

六年春杞桓公卒始赴以名同盟故也。

孝公

名句桓公子襄七年即位二十三年卒在位十七年謚法五宗安之曰孝

辛亥 襄二十三年 ○三月己巳杞伯句卒。○葬杞孝公。

二十三年春杞孝公卒晉悼夫人喪之。

悼夫人杞孝公姊妹

平公不徹樂非禮也禮為鄰國闕。

平公乃悼夫人子於杞為甥有

期功喪然禮諸侯絕期故以鄰國之禮責之闕謂樂闕而不舉也

文公

名益姑桓公子孝公弟襄二十四年即位昭六年卒在位十四年謚法慈惠愛民曰

文

丁巳襄二
十九年

○仲孫羯會晉荀息齊高止宋平華定

衛世叔儀鄭公孫段曹武人莒人滕人薛人小

邾人城杞儀公作齊首人下公谷有邾人

晉平公杞出也故治杞六月知悼子即荀合諸侯

之大夫以城杞孟孝伯會之即仲孫鄭子大叔與伯

石往子大叔將吉伯石公孫段子大叔見大叔文子文子獨與

之語文子曰甚乎其城杞也子大叔曰若之何哉

晉國不恤周宗之闕而夏肆是肆謂宗周之宗族

復生日肆謂之也其棄諸姬亦可知也已諸姬是

棄其誰歸之吉也聞之棄同即異是謂離德詩曰

協比其鄰婚姻孔云晉不鄰矣其誰云之

同謂同姓

也異謂異姓詩小雅正月篇協和比合也云旋而歸之也言協合其親之述者則必類之國旋而歸之也晉棄諸姬則齊高子容與宋司徒見知伯

不鄰侯辭云之哉齊高子容與宋司徒見知伯

高止也司侯薛定也女齊相禮

音汝司侯也賓出司馬侯言於

知伯曰二子皆將不免子容專司徒侈皆亡家之

主也專自是也侈驕縱也大夫極庄知伯曰何如對曰專則速及

侈將以其力斃專則人實斃之將及矣言子容之專則自是人謀害之不待已力盡而亡所以其斃及盡以侈無節無與於人猶待已力盡然後亡為尤速也秋高止出奔昭二十年定出奔

○穀梁曰古者天子封諸侯其地足以容其民其

民足以滿城以自守也。杞危而不能自守，故諸侯之大夫相帥以城之，此變之正也。

○杞子來盟

晉侯使司馬女叔侯來治杞田。

即女叔齊使魯弗歸前侵杞田。

盡歸也。

魯不盡歸杞田。

晉悼夫人愠曰：

平公母。

齊也取貨。

先君若有知也，不尚取之。

尚幾也。言當取女叔侯殺之。

公告叔

侯，叔侯曰：「虞虢、焦滑、霍揚、韓魏，皆姬姓也。晉是以

大。

八國皆姬姓。晉所滅。焦在陝，韓揚屬平陽郡。

若非侵小將，何所取？武

獻以下兼國多矣，誰得治之？

武公獻公君。

杞夏餘

也，而即東夷也。

即就。

魯周公之後也，而睦於晉，以杞

封魯猶可。而何有焉。魯何有祀。欲盡歸其田。魯之於晉也。職

貢不乏。玩好時至。公卿大夫相繼於朝。史不絕書。

府無虛月。如是可矣。何必瘠魯以肥杞。且先君而

有知也。毋寧夫人而焉用老臣。必怪夫人所為。杞取之而不取我。杞

文公來盟。書曰子賤之也。魯歸其田。故來盟。杜云書子賤其用夷禮。或曰

九來盟皆大夫。今因歸田自來盟。重利故感之。

乙丑六年春王正月。杞伯益姑卒。○葬杞文公。

六年春王正月。杞文公卒。弔如同盟禮也。杞因晉取魯田。

而不廢喪。紀故為禮。

平公名郁。歷史記作壽。平公弟昭七年即位。二十四年卒。在位十八年。臨法治。而無清曰。

平

丙寅昭
七年

晉人來治杞田

前女叔齊不盡歸者晉怨公如楚故來治之

季

孫將以成與之

成孟氏邑本杞田

謝息爲孟孫守

息孟氏家臣爲

信子

不可曰人有言曰雖有挈餅之知守木假器

雖挈餅沒者爲人守器皆知不借人禮也夫子從君而守臣喪邑

孟特

信子從

雖吾子亦有猶焉季孫曰君之在楚於晉

罪也又不聽晉魯罪重矣晉師必至吾無以待之

不如與之間晉而取諸杞

侯晉間陳伐杞取之

吾與子桃

桃以

邑與子易魯國下縣東南有桃虛

成反誰敢有之

他日於杞取是成又與子

得二成也魯無憂而孟孫益邑子何病焉辭以無

山與之萊柞。

柞音昨。二山名。

乃遷于桃。晉人爲杞取成。

癸未昭二十一年。

○丁酉杞伯郁釐卒。○葬杞平公。郁公作葬。

悼公。

名成。平公子。昭二十五年即位。定四年卒。在位十二年。謚法年中早夭曰悼。

乙未定四年。

○杞伯成卒于會。

會于皋。鮑見楚成公作成。

○葬杞悼公。

隱公。

名息。悼公子。即位七月。爲弟過殺。謚法隱哀也。

僖公。

名過。弒兄隱公。自立。定五年即位。哀八年卒。在位十九年。謚法小心畏忌曰僖。

甲寅哀八年。

○冬十有二月癸亥杞伯過卒。過者。

乙卯九年春王二月葬杞僖公。

閔公。

名維。僖公子。哀九年即位。六年獲麟。在位十六年卒。

春秋左傳類解杞卷之五終

春秋左傳類解陳卷之六

蘆泉劉績編註

陳

今河南開封府陳州

媯姓侯爵。出自帝舜之後。堯妻舜二女。賜姓姚。周以前爲姚姓。傳曰。虞思妻之以二姚。是也。禹封舜子商均於虞城。地屬應天府。其後商封于遂。濟州鉅野是也。裔孫闕父爲周武王陶正。能利器用。王賴之。以元女大姬下嫁。其子滿而封諸陳。賜姓媯。因舜居媯水也。使奉舜祀。其地在大皞之墟。陳州治宛立縣是也。滿謚胡公。胡公卒。子申公犀侯立。申公卒。弟相公臯

羊立相公卒申公子孝公突立孝公卒子慎公圍戎
立慎公卒子幽公寧立二十三年卒子釐公孝立三
十六年卒子武公靈立十五年卒弟申公燮立二十
三年卒子文公圍立十年卒子桓公鮑立二十三年
入春秋後閔公二十一年獲麟後三年楚惠王使公
孫朝滅之

桓公

名鮑文公子二十三年入春秋桓五年卒在位三十八年謚法辟土服遠曰桓

甲子隱六年

五月庚申鄭伯侵陳大獲

鄭莊公

往歲鄭伯

請成于陳陳侯不許五父諫曰

即公子佗文公之子鮑異毋弟也

親仁善鄰國之寶也君其許鄭陳侯曰宋衛實難

去聲鄭何能為遂不許君子曰善不可失惡不可長

相和好為善欲征伐為惡長上聲養遠也其陳桓公之謂乎長惡不悛

音銓從自及也隨而自及于禍雖欲救之其將能乎商書

曰惡之易也如火之燎于原不可嚮邇其猶可撲

滅商書盤庚篇周任有言曰任音壬周大夫為國家者見惡如

農夫之務去草焉芟夷蘊崇之絕其本根勿使能

殖則善者信矣信仲同既芟刈夷殺以斷之復蘊集崇聚以朽之如此則絕其本根

草不能生而嘉穀暢矣明陳不能懲忿去惡故不許鄭平而取今日之敗

乙丑隱陳及鄭平十二月陳五父如鄭涖盟壬申

及鄭伯盟軟如忘軟謂口含血也如而也洩伯曰五父必不

免不賴盟矣

洩伯鄭大夫洩駕也賴顧藉也

鄭良佐如陳蒞盟辛

巳及陳侯盟亦知陳之將亂也

甲戌桓

五年春正月甲戌巳丑陳侯鮑卒

杜云甲戌前年十二月二

十一日巳丑此年正月六日赴葬日異而皆以正月起文故但書正月慎疑審事故從赴兩書 ○葬

陳桓公

不書月史失之也

五年春正月甲戌巳丑陳侯鮑卒再赴也於是陳

亂文公子佗殺太子免而伐之公疾病而亂作國

人分散故再赴

陳佗

按傳即五父文公子無謚桓公卒佗弑大子而自立桓六年八月為祭殺史以為厲

公疑誤也

乙亥桓六年

○蔡人殺陳佗

前年不成爲君討賊也書蔡人以善蔡知佗爲賊書陳佗

以善陳國不以爲君

○穀梁曰其曰陳佗何也匹夫行故匹夫稱之也

其匹夫行柰何陳侯喜獵淫獵于蔡

淫獵謂放獵非已地而獵

與蔡人爭禽蔡人不知其是陳君也而殺之何以

知其是陳君也兩下相殺不道

兩大夫相殺不書春秋今書陳佗故

知爲君

其不地於蔡也

此與傳不同傳謂厲公墮乃蔡出故蔡殺五父而立之

○公羊曰陳佗者何陳君也陳君則曷爲謂之陳

佗絕也曷爲絕之賤也其賤柰何外淫也惡乎淫

淫于蔡蔡人殺之

厲公

名昭桓公子大子允長弟桓六年即位十二年卒在位七年史作利公疑誤

辛巳
十二年

八月壬辰陳侯躍卒

不書葬魯不書壬辰七月二十三日書於

八月
從赴

莊公

名林桓公子大子允中弟桓十三年即位元年卒在位七年謚法武而不遠曰莊

戊子
元年

○冬十月乙亥陳侯林卒

己丑
二年

二年春王二月葬陳莊公

宣公

名杅曰大子允之少弟莊二年即位僖十年卒在位四十五年謚法聖善周聞曰宣

宣

己酉
十二年

○陳人殺其公子御寇

未誓天子故不稱世于公谷作禦

二十二年春陳人殺其大子御寇

宣公二十二年立嬖姬子欵故

殺大子

陳公子完與顓孫奔齊

完字織仲屬公暉之子與顓孫俱樂

冠顓

孫自齊來奔

奔齊

齊侯使敬仲爲卿辭曰羈旅

之臣

羈寄也

幸若獲宥及於寬政赦其不閑於教

訓而免於罪戾弛於負擔

閑習也弛去也謂去其負擔奔走之勞息肩於

齊君之惠也所獲多矣敢辱高位以速官謗請以

死告詩云翹翹車乘招我以弓豈不欲往畏我友

朋

此地詩也翹翹遠貌車乘以命車來迎也古者聘士以弓言雖貪顓命懼爲朋友所讒責使

爲工正

掌百工之官

飲桓公酒樂公曰以火繼之

古者

炬照夜故曰火記所

辭曰臣卜其書未卜其夜不

敢

言卜重其事也

君子曰酒以成禮不繼以淫義也以君

敢

其事也

成禮弗納於淫。仁也。初懿氏卜妻敬仲。

懿氏陳大夫卜以女

妻敬仲

其妻占之曰吉。是謂鳳凰于飛。和鳴鏘鏘。有

媯之後。將育于姜。

媯陳姓姜齊姓

五世其昌。並于正鄉。

桓

子大

八世之後。莫之與京。

京大也。即成子得政大莫與比。

陳厲公

蔡出也。

姊妹之子曰出。

故蔡人殺五父而立之。生敬仲。其

少也。周史有以周易見陳侯者。

周史周大史也。

陳侯使筮

之。遇觀䷓。

巽上坤下。觀去聲。下觀如字。

之否。䷋。

巽上變為乾坤下。

曰是

謂觀國之光。利用賓于王。

此觀卦六四爻辭。

此其代陳有

國乎。不在此。其在。異國。非此其身。在其子孫。光遠

而自他。有耀者也。

耀光也。遠應子孫自他。應異國。言耀非已生乃光。悠遠自他。

處相射而有耀者也。上文代陳有國以爻坤土也。辭知之。此言在異國在子孫以此知之。

巽風也。乾天也。風為天於土上山也。有山之材而

照之以天光。於是乎居土上。故曰觀國之光。利用

賓于王。

易坤為地。故曰土。巽為風。乾為天。為君。有國。象居土上。謂據高。可以上觀也。凡物幽

下則不能觀。言巽變為乾於坤上。則九四與六三六二是艮卦。有山之材。質上照以乾天之光。下居

坤土之上。能迫近光。故曰觀國之光。此解觀國之

光一句。利用賓于王。此句疑衍。文因四爻動。故止自此爻論起。再取下文。湊為庭實旅百奉之以

玉帛。天地之羨。具焉。故曰利用賓于王。

艮為闕門。庭之象。實

有物在中也。旅陳也。乾又為金玉。坤又為布帛。具

備也。言王庭中實陳者。百品奉之。玉帛是乾。天坤

地之美。具備可以賓見于王。猶有觀焉。故曰其在

矣。此解利用賓于王一句。

後乎。

但遠觀視非近得之身故在後此解其在子孫

風行而著於土故曰

其在異國乎。

行猶變動也著直略切附麗也猶安土上猶人行而居他國也此解其在異國

若在異國必姜姓也姜大嶽

之後也山嶽則配天。

乾天在艮山上非山之卑小者所能配唯山之嶽高火能

配之齊姜姓大嶽之後故知爲齊此又自文上論異國之姓

物莫能兩大陳衰

此其昌乎。及陳之初亡也陳桓子始大於齊。

即無字故

仲五世之孫

其後亡也成子得政。

陳恒也敬仲八世孫

祭四僖

○冬十有二月丁丑陳侯杵臼卒。

杵公作處

甲戌僖

○夏四月葬陳宣公。

穆公

名欵宣公子僖十三年即位二十八年卒在位十六年禮法中情見魏曰穆

巳丑僖二
十八年 ○陳侯款卒。

共公

名朔穆公子僖二十九年即位文十三年卒在位十八年謚法敬事供上曰共

癸卯文

夏楚

穆

侵陳克壺丘

陳邑

以其服於晉也

七年

晉靈立會諸侯于扈共公與盟

秋楚公子朱自東夷伐陳

公也陳

人敗之獲公子茂陳懼乃及楚平

丁未文

○夏五月壬午陳侯朔卒

共公卒楚人不禮靈公復受盟于晉

靈公

名平國共公子文十四年即位宣十年

戊午

六年春晉

成

趙盾衛

成

孫免侵陳

六年春晉衛侵陳陳即楚故也

去年楚在伐鄭陳及楚平晉荀林父

救鄭伐陳未得志故復侵之事見鄭

庚申宣八年

○楚莊師伐陳

陳及晉平楚師伐陳取成而還

辛酉宣九年

○陳殺其大夫洩冶洩公殺作世治音也

陳靈公與孔寧儀行父通于夏姬孔寧儀行父陳二卿夏姬鄭穆

皆東其相服婦人近衣衣曰相音曰以戲于

朝洩冶諫曰公卿宣淫民無效焉宣示也且聞不令

君其納之納藏其相服也勿示道也公曰吾能改矣公告

二子二子請殺之公弗禁遂殺洩冶孔子曰詩云

民之多辟無自立辟其洩冶之謂乎詩大雅板之篇辟邪也下

辟法也言人多邪辟不可自立法而莫之明洩冶居無道國不能去位知其不可諫而諫也

○穀梁曰稱國以殺其大夫殺無罪也泄冶之無罪如何陳靈公通平夏徵舒之家公孫寧儀行父亦通其家或衣其衣或衷其襦襦音如木也以相戲于朝泄冶聞之入諫曰使國人聞之則猶可使仁人聞之則不可君愧於泄冶不能用其言而殺之

壬戌宣十年

○癸巳陳夏徵舒弑其君平國

家氏曰君無道稱國以弑

陳靈朋淫殺諫而執者以氏名書蓋不著徵舒氏名無以見禍亂之所從生討徵舒亦所以治平國也徵舒乃夏姬之子

陳靈公與孔寧儀行父飲酒於夏氏公謂行父曰徵舒似女對曰亦似君徵舒病之公出自其廐射

而殺之二子奔楚。

成公

名午靈公于宣十一年即位襄四年卒在位三十年謚法安民立政曰成

癸亥宣十一年

○冬十月楚人

莊殺陳夏徵舒丁亥楚子入

陳納公孫寧儀行父于陳

補人衆辭也以見大惡人所得計先書殺後書入者

與楚子之能討賊也納者不受而強納之致亂之臣因所不容故書納

冬楚子爲陳夏氏亂故伐陳謂陳人無動將討於

少西氏

動謂與師拒楚也少西微討之祖于夏之名

遂入陳殺夏徵舒

轅諸栗門

轅車裂也栗門陳城門

因縣陳

以爲楚縣陳侯在晉公

時朝

申叔時使於齊友

叔時楚大夫爲申公

復命而退王使

讓之曰夏徵舒爲不道弑其君寡人以諸侯討而

戮之諸侯縣公皆慶寡人

縣公楚縣尹借稱公

女獨不慶寡

人何故對曰猶可辭乎王曰可哉曰夏徵舒弑其

君其罪大矣討而戮之君之義也抑人亦有言曰

牽牛以蹊人之田而奪之牛

蹊徑路也謂取路田中過田主為壞田故

遂奪其牛牽牛以蹊者信有罪矣而奪之牛罰已重矣

諸侯之從也曰討有罪也今縣陳貪其富也以討

召諸侯而以貪歸之無乃不可乎王曰善哉吾未

之聞也反之可乎對曰可哉吾儕小人所謂取諸

其懷而與之也

如取人物於懷而還之為愈於不應者

乃復封陳卿

取一人焉以歸謂之夏州

於陳每卿取一人歸楚聚君一處名曰夏州以

示其討夏氏功也

故書曰楚子入陳納公孫寧儀行父于

陳書有禮也

傳謂納陳臣于陳是楚不毀陳滅人之國惟討其賊矣故為有禮非謂納

二人為有禮也

○穀梁曰冬十月楚人殺陳夏徵舒此入而殺也

其不言入何也外徵舒於陳也其外徵舒於陳何

也明楚之討有罪也

雍曰繼若書楚子入陳殺夏徵舒者則入者內不受是無

以表徵舒之恃楚子之得正

丁亥楚子入陳入者內弗受也日

入惡入者何用弗受也不使夷狄為中國也

註楚

子入陳納淫亂之人執國威柄制其君臣顛倒上下錯亂邪正是以夷狄為中國

納公孫

寧儀行父于陳納者內弗受也輔人之不能民而

討猶可入人之國制人之上下使不得其君臣之

道不可

輔謂佐助鄰國也

甲子宣

十有二年春葬陳靈公

賊討國復二十二月然後葬

○公羊曰討此賊者非臣子也何以書葬君子辭也楚已討之矣臣子雖欲討之而無所討也

辛卯襄三年

楚司馬公子何忌侵陳陳叛故也

時陳以楚子羊

侵欲故叛楚使袁憍會晉鷄澤

壬辰襄

四年春王三月己酉陳侯午卒○葬陳成公

即陳

中國會會其葬故書

四年春楚師爲陳叛故猶在繁陽

楚

地在汝南鞏陽絲南

獻子惠之言於朝曰文王帥殷之叛國以事紂唯

知時也今我易之難哉言晉力未能服楚受陳三月陳成公

卒楚人將伐陳聞喪乃止軍禮不伐喪陳人不聽命臧武

仲聞之曰陳不服於楚必亡大國行禮焉而不服

在大猶有咎而况小乎夏楚彭名侵陳陳無禮故

也

哀公名溺成公子襄五年即位昭八年卒在位三十五年諡法恭仁短折曰哀

五年癸巳襄○冬戌陳楚共公子真帥師伐陳公會晉侯

傅宋公平衛侯獻鄭伯僖曹伯成齊靈世子光救陳

曹伯下公較有言子抑子滕子薛伯與會成諸侯同但少吳鄭耳書戌書救善晉也

楚子囊爲令尹

即公

子真范宣子曰

晉士

我喪陳矣楚

人討貳而立子囊必改行而疾討陳

先時楚以陳叛由令尹子

辛貪故殺之而立子囊爲令尹疾急也言必改陳子辛之爲以討陳爲急務也此言楚必伐陳

近於楚民朝夕急能無往乎

陳近楚故急在朝夕此言陳必從楚有

陳非吾事也無之而後可

以此故晉遠冬諸侯伐陳

陳

秋晉悼會諸侯于戚命成陳事見晉至是蓋還國各遣兵成也

子囊伐陳十一

月甲午會于城棣以救之

鄭地陳留酸棗縣西南有棣城

○公羊曰孰成之諸侯成之曷爲不言諸侯成之

離至不可得而序故言我也

離至離別前後至也先後不一故爲內辭

書成陳若魯也

乙未襄
七年

○楚公子真帥師圍陳十有二月公會晉侯

宋公陳侯衛侯曹伯莒子

比邾子宣

于鄆鄆于執反

逃歸不成救故不書救

○陳侯逃歸

逃義曰逃

楚子囊圍陳會于鄆以救之○陳人患楚慶虎慶

寅

二慶陳執政大夫

謂楚人曰吾使公子黃往而執之

于公

黃哀公弟

楚人從之二慶使告陳侯于會曰楚人執公

子黃矣君若不來群臣不忍社稷宗廟懼有二圖

背君陳侯逃歸

己巳襄

十二年

○宋平人伐陳

陳侯逃歸自是不復與諸侯會十二年楚侵宋報晉取鄭

故宋為

晉討貳

十七年春宋莊朝伐陳

莊朝宋微者

獲司徒卬

陳大夫 卑

宋也

戊申襄二十一年

○陳侯之弟黃出奔楚

黃公殺作光書弟以彰兄罪

陳慶虎慶甯畏公子黃之偏愬諸楚曰與蔡司馬

同謀

時蔡公子樂獻叛楚歸晉

楚人以為討公子黃出奔楚

此下

有蔡文侯欲葬晉傳今取附蔡

○陳侯之弟黃出奔楚言非其罪

也公子黃將出奔呼於國曰慶氏無道求專陳國

暴殘其君而去其親五年不滅是無天也

是無天道兩途之理

辛亥襄二十二年

○陳殺其大夫慶虎及慶甯陳侯之弟黃

自楚歸于陳

陳侯如楚

康

公子黃愬二慶於楚楚人召之使慶

樂往殺之

樂慶氏族二慶畏諱不
收自往故使樂往楚

慶氏以陳叛夏

屈建從陳侯圍陳陳人城板隊而殺人

築城者板
墜也慶氏

遂殺

役人相命名各殺其長遂殺慶虎慶富楚人納

公子黃君子謂慶氏不義不可肆也

肆縱也

故書曰

惟命不于常

昔周書康誥篇言天命無
常有義則存無義則亡

壬子襄二
十四年

○陳鍼宜咎出奔楚

鍼其
麻反

陳人復討慶氏之黨鍼宜咎出奔楚

宜咎陳大夫
鍼子八世孫

其後在楚
為鍼尹

癸丑襄二
十五年

○六月壬子鄭簡公孫舍之帥師入陳

初陳侯會楚子伐鄭

在二十四年伐鄭殺齊見齊

當陳隊者并

堙木刊

隧道也當陳道者塞其井伐其樹也刊除也

鄭人怨之六月鄭

子展子產帥車七百乘伐陳宵突陳城遂入之

突

也陳侯扶其太子偃師奔墓遇司馬桓子曰載余

曰將巡城遇賈獲

陳大夫

載其母妻下之而授公車

公曰舍而毋

言置毋於車

辭曰不祥

男女無別

與其妻扶其

毋以奔墓亦免子展命師無入公宮與子產親御

諸門

御止也門宮門也

陳侯使司馬桓子賂以宗器陳侯

免擁社

免音問喪服也免以示衰戚擁社主示降服

使其衆男女別而

繫以待於朝

別分異也累係累也

子展執繫而見

繫馬韉也執之脩臣

僕之

再拜稽首承飲而進獻

承飲奉也

子美入數侔

而出

即子產數所伴獲不以歸

祝校社

大祝校除不祥於社

司徒致民

致也

司馬致節

節兵符也

司空致地乃還

陳亂故子產正其衆官脩其職

以安定之乃還也

○冬鄭公孫夏帥師伐陳

夏公作蔓

鄭子產獻捷于晉戎服將事

缺入陳之功不獻伴戎服軍衆之服也

晉人問陳之罪對曰昔虞闕父爲周陶正以服事

我先王

虞闕父舜後陳之祖爲周武陶正官

我先生賴其利器用也

與其神明之後也庸以元女大姬配胡公而封諸

陳以備三恪則我周之自出至于今是賴

庸用也元文武

王長女胡公闕父之子滿也三恪周既封杞宋桓
又封陳以足之也恪敬也封其後示敬之而已桓

公之亂蔡人欲立其出

在魯桓九年陳桓卒
蔡欲立桓子厲公驪我先

君莊公奉五父而立之

五父即陳陀桓公弟殺大
子兌而代之鄭莊公因定

其蔡人殺之我又與蔡人奉戴厲公至於莊宣皆

我之自立夏氏之亂成公播蕩又我之自入君所

知也

播蕩流移失所宣十一年陳夏微舒弑
靈公其子成公奔晉自晉因鄭而入

今陳

亡周之大德廢我大惠棄我姻親介恃楚衆介因

以馮陵我做邑不可億逞

億度也欲逞志
於鄭不可度

我是以

有往年之告

二十四年春鄭伯入
晉稽首告伐陳見晉

未獲成命則有

我東門之役

其冬陳楚蔡
許伐鄭救齊

當陳隧者并堊木刊敝

邑大懼不競而耻大姬

競強也鄭姬姓恐不能

天

誘其衷啓敝邑心陳知其罪授手于我用敢獻功

晉人曰何故侵小對曰先王之命唯罪所在各致

其辟

辟誅其罪也

且昔天子之地一圻

方千里

列國一同

方百里

自是以衰

衰差降也次國七十五

今大國多數圻矣

若無侵小何以至焉晉人曰何故戎服對曰我先

君武莊爲平桓卿士城濮之役

在僖二十八年

文公布命

曰各復舊職命我文公戎服輔王以授楚捷不敢

廢王命故也士莊伯不能詰

即士

復於趙文子

趙武

文子曰其辭順犯順不祥乃受之冬十月子展相

鄭伯如晉拜陳之功。

拜晉象其獻功

子西復伐陳。陳及鄭

平。仲尼曰：志有之言以足志，文以足言。

是猶成也。

不言

誰知其志。言之無文，行而不遠。晉爲伯，鄭入陳，非

文辭不爲功。慎辭哉。

傳謂鄭入陳有辭方免晉討非與其興兵報怨也。

戊午襄三十年

六月，鄭子產如陳，泣盟歸，復命告大夫曰：

陳亡國也，不可與也。聚禾粟繕城郭，恃此二者而

不撫其民，其君弱植。

植立寡弱也。

公子侈，天子卑，大夫

教政出多門，以介於大國，能無亡乎？不過十年矣。

丁卯昭

八年春，陳侯之弟招

平聲

殺陳世子偃師。夏四月

辛丑，陳侯溺卒。○楚人執陳行人于徵師，殺之。陳公

子留出奔鄭世子公子

陳哀公元妃鄭姬生悼太子偃師二妃生公子留

下妃生公子勝二妃嬖留有寵屬諸司徒招與公子

過皆哀公弟哀公有廢疾三月甲申公子招公子過殺

悼太子偃師而立公子留夏四月辛亥哀公縊經書

辛丑干徵師赴于楚陳大夫且告有立君公子勝愬

之于楚楚人執干徵師殺之一作執而殺之公子留奔鄭

留懼楚討故出奔書曰陳侯之弟招殺陳世子偃師罪在

招也楚人執陳行人干徵師殺之罪不在行人也

○穀梁曰卿曰陳公子招元今曰陳侯之弟招何

也曰盡其親所以惡招也

歸稱公子
又稱翁

兩下招殺不

志乎春秋此其志何也世子云者惟君之貳也云
可以重之存焉志之也諸侯之尊兄弟未得以屬
通其弟云者親之也親而殺之惡也

○陳人殺其大夫公子過○冬十月壬午楚師滅陳

執陳公子招放之于越殺陳孔奭

招之黨
公作瓊

葬陳哀公

書滅陳在先見其意非討賊也書放之于
越言不當其罪也自是陳滅後五年復興

陳公子招歸罪於公子過而殺之九月楚公子棄

疾帥師奉孫吳圍陳

孫吳悼太子偃
師之子惠公也

宋戴惡會之

戴惡宋大夫

冬十一月壬午滅陳

杜云

壬午乃十月十日傳言十一月誤

輿嬖袁克殺馬毀玉以葬

輿衆也衆發幸之貴者名袁克服云馬陳侯所

乘馬王陳侯所佩王故殺馬毀玉不欲使楚得之

楚人將殺之請寘之

王既又請私

盡私禮於哀公

私於幄加經於顙而逃

性帳也逃

不欲爲楚臣

使穿封成爲陳公

成楚大夫

滅陳爲城

麋之役不諂

麋音君在襄二十六年戊與靈王爭黃顙

侍飲酒於王王

曰城麋之役女知寡人之及此女其辟寡人乎對

曰若知君之及此臣必致死禮以息楚國

爲郊教殺子以

息晉侯問於趙史曰陳其遂亡乎對曰未也公曰

何故對曰陳顓頊之族也歲在鶉火是以卒滅陳

將如之

歲星在南方柳星午位火盛則水衰故今先時顓頊以此滅陳將亦如之卒盡也

在析木之津猶將復由

析木之津箕斗之間天漢也箕在東方木位斗在此

方水位分析木木以箕星間隔故曰析木之津不言析木者此大自南而盡箕故依次而言析木也

歲星在寅位水且陳氏得政于齊而後陳卒亡

盛故陳將復生且陳氏得政于齊而後陳卒亡

能爾自幕至于瞽瞍無違命

幕舜先瞽瞍舜父無違天命廢絕者舜

重之以明德寘德於遂

殷封舜之後于遂國遂世守之及胡

公不淫故周賜之姓使祀虞帝

胡公滿遂之後也臣聞盛德必百世祀虞之世數未也繼守將在

繼陳守舜者兆已在齊之陳氏

昭戊辰九年春叔弓會楚子于陳

九年春叔弓宋平華亥鄭簡游吉衛靈趙厲會楚

子于陳

非盟王所召不行會禮故不聽書諸國

○夏四月陳災

公穀作火

夏四月陳災鄭裨竈曰五年陳將復封封五十二

年而遂亡子產問其故對曰陳水屬也

顛項後故為水屬

火水妃也而楚所相也

丁與壬合水克火故水為夫而火反為妃相治也楚

先祝融為高帝氏火正治火

今火出而火陳逐楚而建陳也

火

星也今大星出而火陳是大本為楚所治今去楚而建助陳蓋水得妃故興也

妃以五成

故曰五年

妃古字同配五行各相配合得五而成故五歲而陳後封

歲五及鶉

火而後陳卒亡楚克有之天之道也故曰五十二

年

是歲在星紀五五歲及大梁酉位而陳復封自酉大梁及午鶉火計四歲又四及鶉火計四

十八歲合前一及四歲共計五
十二歲火盛則水衰故陳亡

○公羊曰陳已滅矣其言陳火何存陳也曰存陳

悌矣曷爲存陳滅人之國執人之罪人殺人之賊葬

人之君若是則陳存悌矣悌慈也言楚滅國執罪

書陳以存其號亦可悲矣舊註甚謬

惠公名吳偃師子哀公孫昭十三年隨楚平王

十四年謚法柔黃慈民曰惠

壬申昭十三年○陳侯吳歸于陳

悼太子之子吳歸于陳禮也

乙未四年春王二月癸巳陳侯吳卒○六月葬陳惠

公

懷公

名柳惠公子東五年即位八年卒
在位四年謚法慈仁短折曰懷

巳亥定八年

○秋七月戊辰陳侯抑卒。○九月葬陳懷公。

閔公

名越懷公子定九年即位
在位二十四年為楚滅謚法禍亂方作曰閔

丁未哀元年

吳之入楚也。

定四年

使召陳懷公懷公朝國

入而問焉曰欲與楚者右欲與吳者左陳人從田

無田從黨

陳人不知所與從田東西分左右
都邑無田者從黨東西分左右

逢滑

當公而進

當公不在右也

曰臣聞國之興也以福其亡

也以禍今吳未有福楚未有禍楚未可棄

也吳未

可從而晉盟主也若以晉辭吳若何公曰國勝君

亡非禍而何。對曰：國之有是多矣，何必不復？小國

猶復况大國乎？臣聞國之興也，視民如傷，是其福

也；其亡也，以民爲土芥，是其禍也。楚雖無德，亦不

艾殺其民，吳日敝於兵，暴骨如莽，而未見德焉。草

生於廣野莽天其或者正訓楚也。使懼而禍之適

吳其何日之有？謂吳無德殘陳侯從之。及夫差克

越，今年乃脩先君之怨。秋八月，吳侵陳，脩舊怨也。

壬子○吳伐陳。夫差

吳伐陳，復脩舊怨也。楚子白昭：吾先君與陳有盟

平王與陳蔡盟，不可以不救。乃救陳師于城父。

在昭十二年

乙卯哀

○夏楚惠人伐陳。

夏楚人伐陳。陳即吳故也。

丙辰哀

○冬楚惠公子結帥師伐陳。吳夫救陳。

冬楚子期伐陳。吳延州來季子救陳。延陵州來謂皆北邑。

子期曰：二君不務德而力爭，諸侯民何罪焉？我請

退以爲子名。務德而安民，乃還。杜云：壽麥以襄二十年卒，至今七十

七歲壽麥卒。季子能讓國年當十五六，至今蓋九十餘矣。

丁巳哀

○夏陳轅頗出奔鄭。轅公作哀平聲。

夏陳轅頗出奔鄭。初，轅頗爲司徒，封田以嫁公女。

稅封內田。以營嫁具。有餘以爲已大器。鐘鼎國人逐之，故出。

道渴其族轅咺進稻醴梁糗暇脯焉以稻米爲醴酒以梁米爲

乾飭暇音段揀脯加薑桂也脯乾肉也

喜曰何其給也對曰器成而

具曰何不吾諫對曰懼先行

恐言不聽先見逐

己未哀十三年

○楚公子申帥師伐陳

時吳夫差出會黃池故乘隙伐之

○

盜殺陳夏區夫

區音謳公作區微詩之後

庚申哀十四年

○陳宗豎出奔楚○冬陳宗豎自楚復入于

陳陳人殺之陳轅買出奔楚

續經

癸亥哀十七年

楚白公之亂陳人恃其聚而侮楚楚既寧

將取陳麥楚子問帥於大師子穀與葉公諸梁子

穀曰右領差車與左史老

差車爲右領官老爲左史官

皆相令

尹司馬以伐陳其可使也

二子相子西子期子高伐陳今復可使

子高

曰率賤民慢之懼不用命焉

右領左史皆楚賤官

子穀曰觀

丁父都俘也

觀丁父楚武王時人克都獲之

武王以爲軍率是以

克州蓼服隨唐大啓群蠻

啓開辟地也

彭仲爽申息也

彭仲爽楚文王時人克申獲之

文王以爲令尹實縣申息

滅申息爲縣

朝陳蔡封畛於汝

開封疆至汝水

唯其任也何賤之有子

高曰天命不諂令尹有憾於陳

諂音叨疑也十五年子西伐吳陳使

直子甲吳故臧陳見吳

天若亡之其必令尹之子是與君盍

舍焉

舍置也謂置立爲師獲齊捨非

臣懼右領與左史有二俘之

賤而無其令德也王卜之武城尹吉

即公孫朝令尹子西子

使帥師取陳麥。陳人御之，敗。遂圍陳。秋七月己卯，楚公孫朝帥師滅陳。

春秋左傳類解陳卷之六終

春秋左傳類解滕薛卷之七

蘆泉劉績編註

滕

元山席書校正

姬姓侯爵。文王第十四子。錯叔繡之後也。武王封之。滕其地。漢沛郡。公立縣。東南是也。鄭氏曰。晉志。公立屬魯國。今兗州龔丘是也。先儒以龔丘本寧陽。隋始改名。按寧陽在漢泰山郡。非沛郡之公立也。公羊曰。卻克過宋。鄭滕薛入邾。邾在今嶧山南。則薛在滕之東。滕在今滕縣之西南也。國微不可考。十七世至宣公。入春秋。隱公以下。春秋後七世而齊滅之。漢志以

為共三十一世。

乙丑隱七年

○滕侯卒。

魯不會故不書葬

七年春滕侯卒不書名未同盟也。凡諸侯同盟於

是稱名故薨則赴以名告終稱嗣也。

告諸侯終以稱子嗣位

繼好息民謂之禮經。

○公羊曰何以不名微國也。

小國故

微國則其稱

侯何不嫌也。

大國稱侯小國稱伯子男今滕侯卒不名既著其微國則下常稱子不嫌

稱侯為大國

春秋責賤不嫌同號。

若齊亦稱侯滕亦稱侯

稱人皆有起文責賤不嫌同號是也註起者 羨惡

不嫌同辭。

若繼位君亦稱即位繼弑君亦稱即位皆自起文羨惡不嫌同辭是也註前君

之楚書地者起其後即位者是繼體之君也若前君薨不地者起其後即位者非繼體之君也

○穀梁曰滕侯無名

用狄道自無名非此之

少曰世子長曰

君狄道也其不正者名也

註戎狄之道年少之時稱曰世子長立之號曰

君其非正長嫡然後有名爾

宣公

名嬰齊隱八年即位僖十九年為宋執

辛未桓

○滕子來朝

滕本侯爵國褊小不能供貢賦故自降以子禮見因書之其後

微弱不能自振故俱稱子或云為時王所黜亦通程子曰滕後服屬於楚故降稱子夷狄之也首朝桓公

之罪自見矣

庚辰

十有九年春王三月宋人執滕子嬰齊

傳見宋

之欲

圖伯

昭公

其即位不可考

丙午文十二年

○秋滕子來朝。

秋滕昭公來朝亦始朝公也。

公即位始來見

辛酉宣九年

○八月滕子卒。

昭公也

○宋人圍滕。

宋文公稱人罪伐喪

也。

滕昭公卒。○冬宋人圍滕因其喪也。

文公

名壽昭公子宣十年即位十年卒

壬戌宣十年

○六月宋師

文

伐滕。

稱師譏用衆也

滕人恃晉景而不事宋。六月宋師伐滕。

丙戌成十六年

○夏四月辛未滕子卒。

卒始書日

夏四月。滕文公卒。

成公

名原文。公子成十七年即位。在位三十年卒。

甲午襄六年

○滕子來朝

秋。滕成公來朝。始朝公也。

即位始朝公。

壬戌昭三年

○春。王正月。丁未。滕子原卒。

原公。夏。叔弓如

滕。五月。葬滕成公。

滕始書葬。卿供小國之葬。禮過厚。葬喪公。滕子來會。故魯厚祔之。

丁未。滕子原卒。同盟。故書名。

襄二十五年盟。重立。

○五月。叔

弓如滕。葬滕成公。

叔弓乃叔老子。叔弓乃叔肅子。服。棺。之。子。桓。六。世。孫。

子服椒爲

介。

服。棺。之。子。桓。六。世。孫。

及郊。遇懿伯之忌。敬子不

入。

懿伯乃子家。羈莊公。玄孫。桓五世孫。椒之叔父也。忌。懿也。敬子。即叔弓。遇。椒。叔父。仇。不入者。禮

椒也為椒有辟仇之也即惠伯曰即公事有公利無私

忌椒請先入乃先受館敬子從之

悼公名寧成公子昭四年即位十五年卒

丁亥昭二
十八年
○秋七月癸巳滕子寧卒公作冬葬滕悼

公公在外季氏使人會葬以結外援

頃公名結悼公子昭二十九年即位二十三年卒

戊申哀
二年
○滕子來朝

庚戌哀
四年
○秋八月甲寅滕子結卒○葬滕頃公

隱公名虞毋頃公子哀五年即位七卒

丁巳哀
十一年
○秋七月辛酉滕子虞毋卒冬十有一月葬

滕穆公

薛

今山東兗州府滕縣南四十里有薛城皇寬孟肆君冢在薛城中今冢在滕縣南五十里

是也

任姓侯爵黃帝之孫顓帝少子陽封於任故以爲姓
十二世孫奚仲爲夏車正禹封爲薛侯在魯國薛縣
薛仲遷於邳十二世孫仲虺爲湯左相復居薛臣虺
祖已皆仲虺之胄也祖已七世孫曰成徒國於摯更
號摯國女大任生周文王武王克商復封爲薛侯齊
桓之伯也薛侯不從黜爲伯獻公始與諸侯盟小國
無紀世次不盡知也自仲虺歷三代九六十四世至

愍侯弘爲齊滅唐表云其可記者。眆生初。初生厲侯
陵。陵生宣。武侯房。房生哀。侯褒。褒生莊。侯元。元生平
侯貴。貴生昭。侯直。直生襄。侯夷。夷生桓。侯辨。辨生康
侯安。興安。興生定。公箱。箱生恭。侯尚。尚生景。侯魏。魏
生宣。侯伯。勤。伯勤。生簡。侯文。歡。文歡。生惠。侯夷。黃。夷
黃。生靈。侯英。英生文。侯俱。俱生隱。侯清。清生愍。侯洪
爲楚所滅。

戊午莊三

○夏四月薛伯卒。

庚寅昭三

○夏四月丁巳薛伯穀卒。○秋葬薛獻公。

薛伯穀卒同盟

襄二十五年盟重立故書

襄公

名定獻公子昭三十二年即位位十三年卒

癸卯定

十有二年春薛伯定卒夏葬薛襄公

薛伯比

襄公子定十三年即位弑

甲辰定十三年

○薛弑其君比

惠公

名夷定十四年即位位十二年卒

丙辰哀十年

○薛伯夷卒

夷公作寅以尼及

秋葬薛惠公

春秋左傳類解滕薛卷之七終